

K-VI-6

Generosa Domine

I

Generosa Domine Lukaskuisto.

Amice Mi.

GENTIS

Opuscula in suis Miscellaneis sub M^o contenta sunt?

1. Carmen gratulatorium in laudem Ing. Adol. ab Alb. Deoyen. Crac. 1630
2. Debitum pietatis Ad. et Exc. fac. Vitellio a Joach. Speronowic. Crac. 1638
3. Aurora natalium Jh. ac M. D. Adam. Mich. Sieniaurki. Sub. Stan. Opedowski. Crac. 1638
4. Hellanodia virtuti, quam cum fide &c. opera Joach. Speronowic. Crac. 1638.
5. Elisei Aurtimontani ad Danthecanos bellum et arma circumspicientes Epit. 1638.
6. Vindicta p. Cornelio Tacito a Nicol. Honskowski. Conviolationis. opposita Crac. 1638.
7. Arctos Sarmatica, quae gener. Juv. ab Alb. Samborski monstrat. Crac. 1638.
8. Nubes Hippocratis Ch. Doct. Viri Andr. Woffowicz a Thom. Canewer die. Crac. 1638.
9. Icon Virtutis et laboris ~~immortalitatis~~ Ven. ac Exc. D. a Nic. Tatowicz. Crac. 1638.
10. Pictas enudita. seu oratio de nexu piet. cum erudit. Joan. Alb. Paris. Crac. 1638.
11. Tiara Episcopalis Jh. ac Exc. D. Andr. Zebicki. Ep. Luceor. a Daniel. Otrebuz. Crac. 1638.
12. Icon heroum virtutis. Gen. ac M. Joan. Deheniki a Joan. Cynerski. Crac. 1639
13. Colofus immortalitatis Jer. ac Pol. Vlad. IV. a Balthas. Stan. Pruski. Lublin. 1638.
14. Felix Luceoria in primo ac Solemni Andr. Zebicki. de. Balt. St. Pruski. Lublin. 1639
15. Placatus in obitum Jh. ac Exc. D. Tecl. in Olyra. Ducep. a Balt. Stan. Pruski. Var. 1637.
16. Memoria na smierci niezmiertelna Andrzeja Jaklini kieza. Krak. 1638 p. M. J. C. R.
17. Aeterna pietas ad festu nuptiale de. a Joan. Cynerski.
18. Aureus causae inf. et perfidum Marcum Rodam. Decretum. Cr. 1636.
19. Aureus Trionis Sarmatici typos. a Ludov. Christoph. Millerus Crac. 1638.
20. Minerva plaudens in Aula D. Jagiellonis ab Adamo Nowakowski. Cr. 1638.
21. Dana Grabarum Ven. D. Mart. Stan. Woffowicz. p. Valerianu. Alnpek Cr. 1638.
22. Rosa praedatione z ziemie do nieba v Kaz. pogri. Mikol. Lawinowicz. H. Kr. 1638.
23. Metamorphosis Apollinis et nove. Musae a Joan. Nicol. Gziaszki. Crac. 1637
24. Urag. civis Jh. D. Stan. Lubomirski. de Joachim. Speronowicz. Crac. 1638.
25. Stephanion Studii. Philosophici Ado. D. Sub. Stan. Opedowski. Crac. 1638.
26. Palma felicitas cl. ac doct. Viri andr. Woffowicz. a Joan. Grynwaldt. Crac. 1638.
27. Gratulatio Jh. ac Exc. D. Stan. Grochowicki. Archiep. eleg. a Mathia Gzbowo. Cr. 1638.
28. Echopadeia seu in uerna renou. Aud. acad. Oratio a Steph. Nizczayck. Cr. 1638.
29. Gracia nuptiales cl. et Exc. D. Stan. Spinek. de. a Joan. Cynerski. Trzebinski.
30. In occursum Jer. Pol. inrich. Pnn. Vlad. IV. de. Alex. Raimysse. volum. 1634. Petrus
31. Ippes volum p. felici et exopt. in alium. Adami Opalovii a Joach. Speronowic. Cr. 1638.

Authores

- | | |
|---------------------------------|-----------------------------------|
| Alnpek Valen. an. 21. | Millerus Juv. Christoph. 19 |
| 2. Aurtimontani Elisej. 8. | Nizczaycki. Steph. 28. |
| 1. Anonymi. 16. 18. | Nowakowski. Adam. 20. |
| Canewer Thomas 2. | Opedowski. Stanislaus 25. |
| Cynerski Joann. 17. 1729. | Otrebuz Daniel 11 |
| Deoyen Albert. 1. | Paris Joan. Albert. 10. |
| Tatowicz Nicol. 9. | Pruski Balthas. Stan. 13. 14. 15. |
| 2. Gzbowus Mathias 27. | Samborski. Albert. 7. |
| 1. Gziaszki Nicolaus 23. | Sowikowski. Nicol. 6. |
| Grynwaldt. Joann. 26. | Speronowic Joachim. 2. 4. 24. 31. |
| Lawinowicz Mikolaj. Franci. 22. | Trzebinski. Petrus. 30. |

24.
(12)

COLOSSVS
IMMORTALI.
TATIS.


Serenissimo ac Potentissimo
VLADISLAO IV.

POLONIÆ ET SVECIÆ REGI,
MAGNO DUCI LITHVANIÆ, &c. &c.

IN
ANNIVERSARIA DIE
relata ex Moschis victoria.


A
M. BALTHASARE STANSL. PRZYLVSKI,
Rhetoricæ in Colleg. Bialen. Professore,
Seniore Contubernij Vilsciani,
reuerenter erectus.

LVBLINI, Apud Viduam Pauli Conradi.



Diem, Domine, quo seruasti imperium, quantâ mereris
lætitiâ celebrauimus, precati Deos, vt te generi humano,
cuius tutela & securitas saluti tuæ innexa est, in-
columem florentemq; præstarent.

Plinius Secundus Traianò Imp. lib. 10. Epi. 60.



PERILLVSTRI ET REVERENDIS-
SIMO DOMINO.

D. N I C O L A O

DE SIECIN

K R A S I C K I.

I. V. D. PROTONOTARIO SS^{mi} D. N. PAPÆ
VRBANI VIII. ET SANCTÆ SEDIS APOSTOLICÆ, ARCHI-
diacono & Administratori Sede vacante Episcopæ
Luceorien. Præposito Krasiceñ. ac S. R. M.

SECRETARIO.

Dōmino & Patrono Colendissimo.

NON sōla Rhodos Soli, verū etiam Sarmatia Regi
suo erigit Colossos; atq; eo maximè tempore, debita cum
submissione consecrat, quo facit Victoria Moschouitica
memoriam Anniuersariam. Et sanè meritò: nec enim tantum
apud Rhodios grati animi declarator Chares Lindius repe-
ritur: nec dum omnis penè natio de omnibus VLADISLAI IV. for-
tissimè gestis commemorare sibi pulchrum ducit; mihi mentio
gloriosæ ex Moschis reportata victoriæ turpis esse potest. Scio
quàm multi antea tam insignem victoriam egregiis celebra-
runt,

runt prædicationibus; sed me id mouit nihil, tum quod sicut
pugna, ita & triumphus plures recipit buccinatores; tum quod
minimè erubesco eruditorum vocari Echo modò apud Pana in
gratia. Quem cum nomino, Te, Perillustis Domine, intelli-
go: cui non Amynthæ cannam, at COLÖSSVM IMMORTA-
LITATIS offero cultu officioso. Tametsi enim fortunatissimo
Regi libenter adscribimus victorias; tanquam ei, qui iuxta
morem veterum Germanorum noluit in Sacrosancto viuere
Coniugio, nisi prius tot hostium capita obiulisset Patriæ;
nihilominus ab his trophæis nemo sanus potest secernere ve-
strum regale Sacerdotium. cuius Sanctissima holocaustoma-
ta istam nobis à DEO impetrarunt victoriam; quo velut
Moyse manus in cælum tollente, nouus hic Iosue superabat
Amalechitas. cuius deniq; preces confirmabant nostrorum
militum dexteras, & hostilium gladiatorum cuspidem re-
tundebant. Quare, Reuerendissime Domine, cum hæc vi-
ctoria fructus sit lachrymarum atque obsecrationum vestra-
rum, cumq; vestri fletus pepererint Serenissimo Regi im-
mortalitatis COLÖSSVM; iustissimam habeo causam, ob
quam Tibi eum quantulumcunq; dedico sermonem. Acce-
dit huc, quod sicut clarissimis genere & virtute Maiori-
bus Tuis erat proprium, ita Tibi planè hereditarium
Reipub. atque Ecclesiæ commodis seruire; propter quod v-
traq; non solum te viuum colet; verum cineres etiam Tuos
æternis celebrabit laudibus. Et licet in omnibus actionum
partibus ita Tibi semper constas; vt referas Iani prouiden-
tiam, Nestoris grauitatem, Carneadis vim dicendi, Re-
guli

guli fidem; tamen in hac Administratione Episcopæ, adeo
Te præbes eximium; ut potius admirari valeam, quam
consequi oratione, Tuæ prudentiæ atque iustitiæ maiesta-
tem. Omnino velut Atlas fortissimus tuis humeris orbem
hunc Ecclesiasticum fulcis, erigis, sustines; quorum & an-
teactorum in Ecclesia DEI & Patria meritorum, amplis-
simam quantocyus referas testificationem, ex animo preca-
mur. Mihi porro non mediocre accedet ornamentum; si
me iudicaris haud indignum, qui per Te alloquar magnum
Sarmatiæ Regem: Fateor quidem minus à me sufficienter
esse tantum erectum COLOSSVM: ast qui velit res gestas
Potentissimi Regis complecti; sacula sibi optare debet, &
innumerabiles annos, & quantam Rex ipse meretur æta-
tem. Illud quoque non nego Serenissimum VLADISLA-
VM IV. qua modestiâ est, ferè obliuionem istius victoriæ
malle, quàm gloriam: sed Moschi victi, libenter audiunt,
quòd hunc tantum ac talem, non alium habeant victorem;
mihique, ut amici federe ignoscunt, si quando iure belli ho-
stes appellati. Accipe igitur, Reuerendissime Domine,
eum COLOSSVM: immortalitatis; quia immortalem re-
fert victoriam, immortalcm facis Regem; hoc ipso feli-
cior Rhodio, quamuis ille post multam seriem annorum
terræ motu prostratus, iacens quoque fuit miraculo. Ac il-
lius pauci pollicem præ magnitudine amplectebantur: hunc
totum, meque simul benignâ modò & grata facile compre-
hendes manu. Quod ego te vehementer rogans; ita immor-
talitatem voueo inuictissimo Regi, ut vita diuturna sit,

*Æterna maiestas. Tibi verò Reuerendissime Domine,
Et per te, ut Ecclesiæ ac Reipub. nostrorū Collegio, prospe-
ra omnia, Et digna seculo tuo contingant, valdè quàm
exopto. Dat. Bialæ. Die 17. April. A. D. 1638.*

Perillustri Et Reuerendissimæ D.V.

deuotissimus,

M. BALTAZAR. S. PRZYŁVSKI,

Rhetoricæ in Colleg. Bial.

Professor.

S. C. V.

COLOS.

COLOSSVS

IMMORTALITATIS

LÆTVS ILLE AC CELEBRIS DIES RE-
 diit: quo illustris, & ante hoc tempus inusitata, de
 Moschorum gente victoria à Te relata, Serenissime ac
 potentissime Rex VLADISLAE: cùm vniuersam Rem-
 pub. Polonam iucundissimâ luce compleuit: tum No-
 mini Tuo perquàm augusto, famam in omne sæculum,
 gratissimo Posterorum celebrandam sermone, concilia-
 uit. Itaq; lætarinè debeat, an mirari subditus Tuus? sa-
 nè ignorat. Ad lætitiâ, & faustas acclamationes inci-
 tatur communis Patriæ exemplo, hilarem ac erectum
 præferentis vultum; dum secum ipse recolit; quomo-
 do alij propter hostes feliciter domitos ingenti cumula-
 ti sunt gaudio: alij propter Regiam Maiestatem saluam
 ac sospitem ad sedes Patrias reductam; ritè ac piè, vt
 debûere, supremo ac præpotenti rerum Moderatori gra-
 tias agebant immortales. Sed potissimùm incipit mens
 exultare; quando identidem repetit, ad Maiestatis Tuæ
 optatissimum Varſauiam ingressum; tantum omnium
 ætatum atq; ordinum concursus factum, tam effusam,
 tantamq; omnis generis multitudinem; vt illa ipsa Urbis
 mania,

mania, si natura pateretur, sedibus suis relictis, obuiam Tibi prodire quodammodo cupere viderentur. In admirationem verò adducitur vehementem; quoties occurrit Tuæ in vindicandis perduellibus inauditæ celeritatis ratio: ob quam, nisi te hominem cerneremus; ipsum præliorum Numen, seu cælestem aliquam in humano corpore Potestatem censeremus. Quis enim homo, aut tam inuictæ fortitudinis; ad cuius aduentum inflati animis hostes, immanitate barbari, multitudine innumerabiles, omniq; copiarum genere abundantes perhorrescunt? aut tam stupendæ in conficiendo bello pernicitatis: qui statim ut venit, vidit, Hostem, simul vicit, veriori fortunæ spectaculo, quam olim Cæsar de Pharnace prædicandus? aut deniq; tantæ prosperitatis in regenda Polonia? de cuius medio si quis mortalium sublatus per fauorem diuinum, in aliquo proximo cœli loco reponatur; ac respiciat incredibili villas lætitiæ gestientes voluptate, vrbes apparatussime triumphantes, atq; plena hilaritatis omnia: profecto desiliet è nubibus, nec non viciniam cœli cupidè derelinquet; ut Tibi subiaceat Regi fortunatissimo, atq; terris Tuis felix perfruat. Quocirca, Potentissime Rex, in hac gratissima Moschouiticæ victoriæ recordatione; liceat talium rerum magnitudine commotis, & redundantem, atq; extra pectoris arcana erumpere gestientem lætitiā styli officio testificari; & admirationem tam rari in bello certaminis atq; roboris, dicendi tenuitate indicare. Arduum quidem est eloquio tanquam publico præcone,

cone, Monarchæ amplissimas virtutes in illustri hominum omnium theatro, ad sempiternam posteritatis memoriam commendare : ast ipsa etiam Numina animaduertimus, non tam accuratis venerantium precibus, quam modestiâ & moderatione gaudere ; gratioremq; existimari, qui aris eorum purum ac innocentem animum, quam qui meditatam intulerit orationem.

Non prædicabitur hic immensa, & super optata humana, à præstanti ac æterna natura ad Te delata magnitudo bonorum : quæ vt Tibi perennia & perpetua in constanti maneant statu ; nos Sarmatæ partim communis incolumitatis atq; imperij, partim Tuâ causâ, (sicut in dies singulos facimus) nihil magis velle, & optare debemus. Neq; nunc repetetur, quantas Tu res superioribus pacis temporibus & belli, quantaq; felicitate, iam assentiente Repub., exercitu obtemperante, hoste tremante, iam ventis etiam, tempestatibusq; obsecundantibus ab ipsa gesseris iuuentute. Sic enim semper Tibi quadam ad amplitudinem & gloriam, & ad negotia excelsa benè peragenda diuinitus adiuncta fortuna ; vt in Tua potestate reposita esse videatur. Cuius benigno flatu aspirante ita multa fortissimè confecisti ; vt ea non tantum Alexander, aut Africanus, aut Annibal videre, cum discerent rudimenta militiæ ; sed parentes atq; institutores eorum optassent facere, dum docerent. A beato illo ac salutari Polonis die, placet vela orationis pandere : quo Te Tua virtus non ambientem vltrò præsen-

B

tauit

tauit ad faustè recipiendum diadema Regale. Quod posteaquam in medio Reipub. sinu, omnium suffragio Ordinum, consensu omnium Prouinciarum Rex electus, spectante toto orbe recepisti: continuò Moschouitica arma Regnum inuadentia Tuum, Tibi imposuere bellandi necessitatem. Aduerteras hostem naturà barbarum, voluntate perfidum, multorum iniuriis annorum superbientem, inauditâ sæuitiâ memorandum, omnes etiam immanissimas gentes acerbitate quadam naturæ, & rabie furiosâ superantem. Cognoueras non contra leues Medos, imbelles Syros, Parthorum arma volatica, Tibi rem gerendam; sed cum ea natione, quæ sæpius rebellando, diu multumq; Reges Poloniæ sollicitabat: quæ sub tempus induciarum satis prolixum, Martis palæstram instituerat, ab Exteris peritissimos quosq; bellorum Magistros in exercitum sui aduocauerat, atq; ita omnibus pugnandi artibus instructa ad vsum & disciplinam militarem assueta, ingenti apparatu bellico, milite fermè innumero, audaciâ & confidentia innatâ, ad pericula, ad casum, fortunamq; sese munierat. Suscepisti nihilominus quàm acerrimè, tam libentissimè eiusmodi bellum; in consilio, nihil nisi diuinum Numen, Patriamq; charissimam habens. Gladium de solenni consuetudine Tibi traditum, ad defensionem Tui Regni, ad publicam scilicet protegendam rem animosè strinxisti: in vagina reconditum fouere, cùm populi agitur libertas, aliis ignominiosum; Polonis etiam nefas esse duxisti. Atq; iam Smolensco infinitæ hostiles copiæ, multiplici armatu-
râ,

ra, equis, commeatū, argento, auroq; imminebant abundantes: iam Lithuani præstantissimi, & verè Herculei animi Viri, cum strenuo & forti Imperatore insignem in resistendo eis, & gratam Reipub. operam nauarant: Tu prosequente cœli fauore, Tuorum paucitati præsidia allatum iuisti; tantò lætius & alacrius; quantò certius Te pietas paterna comitabatur, Moschum impietas: Te clementia, illum crudelitas: Te fides & iustitia, illum nefas, cum omni perfidia: Te sacrosancta religio, illum furor, & superstiosa maleficia. Et licet si non tam ad prælium committendum, quàm ad supplicium de sædifragis sumendum venires: consiliis tamen tantis bellum administrabas, vt cum quouis Rege vel Imperatore summo certaturus videreris. Sapienter ratus interdum generosos Elephantes deludi à contemptis syluestribus feris. Primò enim Zaporouios (quorum industria ac fortitudo sæpenumerò est perspecta) in partem exercitus Tui aduenire mandasti: deinde populis barbarorum non inuitè suppetias offerentibus, commilitonum munus, spolia acquirenda indulgisti; mittens eos in vastationem Moschouiæ remotioris; vt & militi auxiliator accederet, & hostis à fronte, & tergo infestâ armorum depopulatione premeretur. Digna sanè res erat admiratione, & felicitas optabilis annalium monumentis inferenda, hostem hoste oppugnare. Sed magis mirum, quòd voluntarius ibat sub auspiciis Tuis hostis sæpe Polonus; & signa contra quæ stare solitus erat, sequebatur: quòd Scythia ille ex immensis camporum spatiis ad imma-

nitatem genitus, & qui nullius Regis studiose amicitias curat; nullum Monarcham ex animo veneratur; militabat alacer in spem Tuæ gratiæ: pro omni merito id potissimum vnum reposcens; vt Vladislauianus, vt Tuus miles diceretur. O quanta fuit virtus, hæc ambitio! ô quantum vinculum ad obligandos homines, optimi Regis maiestas!

Copiosâ extulerat laude amplificatrix veri antiquitas Prouinciâ Galliam, quòd illa sola verè & artificiosè potuit exprimere vim eloquentiæ & dignitatem, nouo atq; inusitato Herculis simulacro. Quid de te posteri dicent ô Polonia! quàm à diuersis, & longinquis locis confluent ad Te Ciuitates! quàm amplum, & speciosum argumentum Historia, stylus omnis accipiet à Te! quæ sola non pigmentis coloratam, non lineamentis conformatam Regis imaginem; sed qualem Atticus Xenophon suum Cyrum cupiebat; qualem sæcula expetebant; genuisti viuentem, bellantem, mundi admirationi exposuisti. Hercules ille Gallicus vinculis & catenulis auro electroq; confectis, ingentem hominum multitudinem ob linguæ suauitatem trahebat ab aure omnibus reuinctis: & quantumuis valde tenuibus ducerentur vinculis: tamen neq; fugam facile occurrentem, neq; vllam tergiuersationem cogitabant; verùm cum alacritate & lætitia sequebantur ducem admirantes, vltro festinantes omnes, & laxatis torquibus, etiam anteuertere studentes; perinde quasi grauius laturi, si soluerentur catenis. Tuus Rex inuictissimus, cùm possit dici ipsa copiosè loquens sapientia; amore tamen, beneuolentia, humanitate,

te, clementia, bonitate, & aliis multis virtutibus longè præstantioribus facundiâ, in obseruantiam, in amorem suæ maiestatis attrahit vniuersos : atq; adeò effecit catenatos, vt & alieni gestirent ei dulcem seruire seruitutem ; & Sui, post auocatum publicâ fortunâ omnes sollicitari debuissent, omnes inter se conqueri, optimo Rege, velut benefico sydere tam repentè orbatî. Hinc interea illud populi vnanimis excogitarat consensus ; vt ad leuandum dolo-rem, ad permulcendos mærores, adhibendamq; consolationem aliquam, in absentia tanti Boni ; quilibet vel effigie ipsius depictâ oculos pascebant suos ; vel si id angustia vetuit familiaris ; diuitem affectum in pectoribus pro Apelle statuebant : sibi iam non opes, nec honores exoptando ; at simplex & vnicum erat omnium votum : salus, & reditus incolumis VLADISLAI Regis. Ita, ô Patria mater nostra felicissima, non modò fortissimos milites, expertissimos Duces, clarissimos Senatores, laudatissimos Oratores progeneras ; sed Regibus quoq; , seu potius Orbis totius amoribus, & deliciis imperium beas. Quo nomine iam Tibi cedit Cretensis terra parui Iouis gloriata incunabulis ; Rhodos aureo imbre opulentissima cedit ; fidem constare nescimus ; Numen verò mirabile, parentem nostræ vitæ, fortunæ, copiam diuitiarum nobis dedisti, cùm VLADISLAVM Regem habemus.

Verùm vt à re, à Te, Magne VLADISLAE non deflectat dictio. Venisti ad mænia Smolensci hostium barbarie vndiq; circumuallata ; illamq; ingentem turbam, vel

Turcarum vastissima Regna diceres subacturam, si numerus non animus in acie depugnaret. Ergo prudentissime statuisti, quam primum opitulari obsessis, atq; eos, quasi iactatione magna laborantes in portu respirationis collocare. Intercluserat ignaua natio aditum in arcem suis corporibus: & nec die, nec nocte via Polonis patebat transire volentibus. Tu quid eo loco consilij caperes, nondum planè definieras: utpote, qui consulere assueuisti lentè, consulta exequi festinanter. Aderat non vnus Decius ex Tuis, qui cupiebat se deuouere, atq; immittere in armatas hostium copias: sed non placuit inconsideratè, sine iudicio, & ratione ad rem descendere. Iam conceperas esse fatuitatem, sedendo, aut votis debellari credere posse: audendo, agendoq; rem Polonam creuisse; non his sensibus, consiliisue, quæ timidi cauta vocant. Sciebas in negotio salutis dilationem maximè haberi periculosam; multaq; bella impetu valida, per tædia ac moras euanuisse haud te fugiebat. Aperiendam igitur viam ferro censuisti: Claudium Marcel- lum Romanum igneo impetu laudatissimum imitatus Du- cem; hostem à latere inuasisti, pugnasti, terrore comple- uisti. Ferebant initio minus in prima & altera munitionum oppugnatione fortunam fauisse Tibi: sed ignorabant; pe- titos etiam Leones infestis formidolosos animalibus: & percussum tantæ fortitudinis pauore loricatum ceruum Prozorouium, facile vnà cùm numeroso grege, desertâq; statione, diluculo sese in fugam coniecturum non spera- bant. Quo tam nauiter & strenuè fugiente, cæteri quoq;
similis

similis audaciæ, solo forsitan officioso tormentorum fumo, velut examina apum, loco suo exacti, sublimi Tuæ cesserunt virtuti; atq; Smolenscum, etiam per fossas & val-la introitum liberum, lateq; patentem reliquerunt. Tantus fuit Tuæ Maiestatis fulgor, vt quemadmodum ad Orientem Solis cuncta suâ luce lustrantis, vniuersæ tenebræ dissipantur: ita gloriosa aduentus Tui celeritas, Personæq; conspectus heroicæ, manus & animos hostiles exanimarat: & tanquam horrendæ caput Medusæ clypeus Tuus, omnes propè in mirificum stuporem conuerterat.

Post fugatas itaq; timidas cohortes, pro animi Tui voluntate in omnes propensâ non potuisti conquiescere; quineos ipsos in arce, qui adeò hostili impetitione infestabantur, milites comiter inuises; eorumq; egregiam in repugnando virtutem in defendendis manibus singularem industriam collaudares. Quæ res, quàm optatam omnibus voluptatem, quàm insolitam lætitiâ, quantamq; attulerit alacritatem; ex ipsis Tibi occurrentium oculis, fronte, & vultu, ex illa, celeritate ad iucundissimum Tuum ingressum complectendum, poteras colligere luculenter. Ita enim plausibili exceptus es affectu: & tam præclara communis hilaritatis significatione: vt quocunq; tulisses gradum, populus sequendo, circumcursando, præcedendo, vias obstruendo, blandam Tibi facere viderentur iniuriam. Ipsi verò Ordines militum amplissimis donis à Te cumulati, ad osculum Sacræ manus Tuæ admissi, quasi Lethæo flumine, aut diuino poti nectare; omnium, quæ ma-
xima

xima sustinebant, incommodorum, omnium ex vulneribus dolorum obliti sunt: Tui solum perpetuo memores, effusa ab intimis sensibus gratulatione, annorum longam Tibi vouebant seruitutem. Quid cum templum religiosissimum S. Michaelis memoriae dedicatum adiisti? nonne illa ædes licet si vel calamitate bellica, vel temporum iniuriâ deformata, sibi tum visæ splendescere, & quadam gratulatione gestire? quod ad veterem magnificentiam per singularem Tuam munificentiam sint venturæ: quod Tu solus commotus squallidâ ac pulueris plenâ loci consecratifacie, sanctissimè votum nuncupasti; Te victorem, Fanum illud quàm primùm regali munificentia in antiquum splendorem restauraturum. Qua certè sponsione satis eximiâ, tam erga te facilem ac beneuolum Diuum MICHAELEM effecisti: vt sicuti olim Lescus Niger eius auxilio confirmatus, Iazygas Lublinensem regionem crudeliter depopulantes, inter Naruam & Nemenem penitus extinxerat; ne vno quidem de suis desiderato: ita quoq; Tibi, cum caelesti legione præsens affuisse colligitur, in toto felicissimo belli progressu.

Sed cum totum Smolenscum in oculis aded Te ferebat: interea illi fugâ bellantes confluxerunt ad Ducem illum suum caluum: vt fortè, cuius in auspiciis fortunam aduersam fuerint experti, in meliores Diuos habuissent. At senex, pridem autumans mereri fustuarium, qui signa reliquit, aut præsidio decessit: auersatus Principem fugitiuorum, arcuit à castris, transfossas, tanquam mancipiis statiu
ua al-

ua assignauit: spreuit Minutium, sed nec ipsemet præstitit
se Quintum Fabium. Tu verò, qui in negotijs periculo
obnoxijis laudandam retines celeritatem: absq; mora pro-
fectus es contra hostiles turmas: & ne Tibi astutè vel ela-
berentur; vndiq; exercitum eis opposuisti; vel subsidijs à
Tyranno suo adiuuarentur, milites in custodijs collocasti.
Nempè per quàm rectè infidebat illud menti Tuæ: Ar-
gum esse oportere, qui belli Dux est; in tergo, in fronte, in
capite, in pedibus oculos habere. Videras, castra inexpu-
gnabili vallo, & aggeribus vltra Moschouiticam sapien-
tiam excogitatis munita: nihilosecius, vt ex lucerna incen-
sa, vel lychno neglecto domi, nonnunquam haud me-
diocrem oriri conflagrationem: sic ex priuatis Superio-
rum odiis, gradum ad futuram infelicitatem, non vanus
augur præsentiebas. Perspexeras ipsorum armaturam Tu-
is incitatiores impetu ruentibus nocituram esse: vbi nihil
temerè secum agi aduertissent, veluti belluas in caueis
inclusas, feritate syluestri exutà, non difficulter tempo-
ris processu ad mansuetudinem, Tuamq; potestatem
venturas. Nimirum, cùm abstineres oppugnatione, non
dubitabas, quin eos obsidendo superaturus eras, qui vnà
cum suo Duce senescebant in dies: non comneatum,
non supplementum, non pecuniam acquirebant: sed sin-
gulis propè diebus, pecorum in modum consternati, li-
gnationis causà discedentes cædebantur, fugabanturque:
& plures aliquando Moschorum strages editæ, quàm
Tuæ lenitatis, & misericordiæ iura permittebant. Ad

extremum animum intentum habens, neque occasione
Tuæ deesse: neq; suam occasionem hosti dare curabas;
coniiciens fore, vt illa multitudinis colluies, frigore, ge-
lu, fame, morbis, ærumnis potiùs, ac fecibus suis, quam
Tuo ferro consumeretur.

En Moschi (liceat illos breuib; appellare) quò per-
fidia vestra detestabilis perduxit vos! Cùm in prima acces-
sione, nunc cuniculis clam, nunc machinis palàm impugna-
retis Smolenscum: tum ipsius terræ, quam suffodiebatis,
faucibus multi absorpti, perenne pabulum flammæ Tarta-
reæ facti estis. Obsessos milites pristinæ virtutis, Poloni no-
minis memores, adhibito exercitu tam numerofo, alios
inopiâ rerum affligebatis: alios ad deditionem turpi factio-
ne tentabatis; & ecce vix aspectus sui fulgur. Rex poten-
tissimus intulit, subito exhorruitis, omniq; furenti ac per-
uerso conatu posthabito, fugientes ignominiosè auolastis;
ex fulminastris fastuosos, hostibus etiam odiosi apparuistis
fugitiui: concurristis in illa aluearia, admuntiones, in-
quam, Vestri Ducis; arbitantes vallum, & fossas, non
armatos armatis obstare: cùm tamen ibi ipse àér pelli-
lens ægrotationibus vos exanimauit, esuries confecit, lo-
cus ipse vindex, perfidiæ pœnas exegit. O miserandam
vestram vesaniam! ô cæcam temeritatem! ô importu-
nam malitiam & conditionem nimis luctuosam! Iam e-
nim non tam inimicorum viribus, non aliquâ vastitate
agrorum, quàm propriâ amentia, propriæ magnitudinis
mole ruitis: & nunc intestinis dissidiis exardescetes,
nunc

nunc pauciores exercitum fugientes, turpissimâ, miser-
rimâq; morte, vestris vitiis peritis.

Videtur, Serenissime Rex, id accidisse huic nationi, quod olim ingeniosa Pòëtarum antiquitas affirmavit de Gigantibus: vt quoniam rupto imperio Iouis impetum fecissent in Deos, atq; eos cœlo detrudere studuissent; ipsi prius cum probro ingenti fulmine percussi, & ad inferos erant detrusi. Ita isti Gigantuli, quibus ex contumaci arrogantia iurisiurandi & fœderis Sacramentum violare, bellumq; Poloniæ indicere ludus & iocus fuit, Tibi pœnarum plus, quàm exoptares, dederunt.

Verùm ne aliena stultitia Tuarum virtutum splendori obstrepat: ad propositum narrationis curriculum oratio conuertitur. Eximium profectò, & posteris, imitandum Tui specimen dedisti: dum hostem tam insolentem & superbum, tam validis aggeribus circumseptum, tantaq; corporis & animi duritate formidandum, excellenti belli gerendi prudentiâ infregisti: dum præter omnium consuetudinem gentium, totâ hyeme, stipatus Te digno exercitu, in præduro, & frigoribus immensis concreto solo, permansisti: & non modò cum hostibus ferina carne distentis, sed etiam cum elementis ipsis pugnam Tibi desumpsisti: dum deniq; primus, aut cum primis gaudebas castra obire, operibus militum adesse, speculatum egredi, modico & castrensi cibo ieiunia longa solari; nullumq; laboris, nullum tædij genus recusare: vt iam tunc abundè posset animaduerti, alios Regi pu-
C 2 gnare,

gnare, Te Patriæ: alios tantum imperata exequi, Te & imperare, & facere: atq; cum Dominus clementissimus voceris; libertati civium inferuire; pro omnium dignitate & otio, noctu diuq; vigilare, propriæ sanitatis nullam propemodum rationem habere. Equidem Tibi aderant semper addictissimi, pro Tua comitate, & humanitate erga se, omnium animi militantium: verum eos præcipue hac laboriosâ diligentia, & diligenti providentiâ ita deuinxisti; ut pro Te millies, mortem libentissimè optetere, quàm sine Te semel vivere, malle se aliquoties proclamarent; suam^q etiam nunc beatam arbitrentur ætatem; quòd sub tam indefesso & sapiente Rege nacti essent facultatem merendi stipendia.

Sic Tua, Rex Magne, est virtus mirabilis, ut Te

Qui superare velit, par velit esse Diis.

Quocirca, & hostes obstupefacti hoc Tuo inuicti animi robore, illaq; assiduâ curâ, vigiliâ, atq; industria in agendo incredibili adducti in metum, propendere cæperunt inclinatione voluntatis ad deditionem. Sanè quidem extimescebant Tyrannum in sua metropoli debacchantem, iracundiâ & stomacho ardentem: verumtamen magis voluerunt suorum capitum consulere salutem; quàm eius atrocibus minis, & amentibus furiis parere. Quippe Græcæ fidei Moschis, illud Græcum in memoria hærebat: *τόν κρείμυς ἔχον*. Iamq; multi tabernaculis inclusi, tacitè suas calamitates lamentabantur: pleriq; tumultuantes inopiâ vulneribus, variaq; infirmitate depa-

sti,

sti, iam moribundi, postremum spiritum in admiratione
nominis Tui, & sui Ducis detestatione fundebant. Inge-
miscebat inter hæc Sechinus, & in modum amentis atton-
itus, sæpenumerò seipsum allocutus: Quò fugio? præ-
liumnè tentabo? vt, cum VLADISLAVM viribus inte-
gris ferre non potui, debilitatus sustineam? Peto Moscho-
uiam? quam promissis victoriæ delusi. Credo me Duci
meo? sed inuisus sum. Quid igitur faciam inter arma
& odia positus? à tergo hostibus vrgeor: à fronte, dome-
sticis minis & execrationibus. Si mors accesserit, euase-
ram: at ecce nec animum sequitur manus, nec manum
gladius, labat ferrum, fremit dextera, mens deficit. Heu
quanta difficultas est, etiam calamitosus interire. Implor-
at ergo desperatione adactus, misericordiam, Rex cle-
mentissime, Tuam: obsecrat delicti veniam: omnia sua,
suosq; in deditionem pollicetur. Tu sorte quadam cæle-
sti, conseruando generi humano datus, ne indignis qui-
dem benefacere destitisti; indulgentiam, salubritatem,
vitam exoptatam tribuisti. Quàm iucundum non solum
hominibus, verum syluis etiam, & montibus fuerat, illu-
xisse felicissimum illum diem, quo Tibi post conditio-
nes acceptas, Imperator paulò antè elatus nimium & in-
flatus, exercitum, castra, clauam cum omni veneratione
reddebat! Signiferi vexilla deponentes humi procumbe-
bant: Tribuni, Primipili, centuriones, suas legiones co-
hortes, centurias, vt se proiicerent suppliciter ad pe-
des Maiestatis Regiæ, deducebant: machinas, tormenta,

tela, scuta, & quidquid armorum ad petendum & tegendum, perfidia nefanda contra nos ad miraculum vique comparauerat; totum id gloriosa virtute acquisitum Tuâ, militari Poloniæ vsui offerebant!

Hæc cum Senatus, Populusque Polonus secum considerat; & Regum sempiternæ recordationis excitat memoriam: cernit reuera, tam pristina Antecessorum Tuorum, quam rectissima & pulcherrima Diui Patris Tui facta, à Te superata esse. Non libens hoc fortè audis, Rex Potentissime; sed illi, dum dicitur, gaudent de cælo; & translati ad sydera, & quietis locum, adhuc crescunt in successore, crescit Pater in Filio, & radius gloriæ in eos ascendit. Sigismundus Primus, (vt alios antiquiores fileam) affixerat ille multis Moschouiam cladibus: sed non paucos nobilitate illustres, de suo amiserat exercitu. Stephanus, eam quoque perniciosè, fertur eneruasse: verum antequam victor extiterit, bellum gessisse diuturnum. Diuus Parens Tuus insigniter eandem concusserat: sed de tam laudabili & inusitata, non egerat triumphum, dedicatione. Tu porrò incolumi ac penè integro milite, tantâ celeritate, tot millia Moschorum Tuæ potestati subiugata habuisti. Et quod nihil maius ad gloriæ magnitudinem adiici potest; illorum cruenta victoria, quasi laniena, paulum crudelior comparuit: à Te satius arte & clementiâ Moschi victi sunt: nec ligati Ducēs, cæteraq; captiuorum turba, ante Tuum triumphalem ducebantur currum: at scelus domitum, prostrata perfidia, audacia catenata, furor

vinculus, luxuries còercita, libido constricta, nexu ferreo
tenebantur, Ignoscent igitur pientissimi Prædecessores: Pa-
ter quoq; Tuus augustissimus SIGISMUNDVS III. igno-
scit & hanc nouam rationem, misericordiâ vincendi, ad-
miratur.

Sed neq; hîc tanta gestorum claritate circumfusus, re-
ceptui canere constituisti. Dimisso agmine deditio, & re-
fecto aliquantùm exercitu, ampliorem mens Tua agitabat
laudis materiem, & persequi reliquias victoriæ ad metam
propositam. Aperire Tuis ciuibusterras, quas natura lon-
gè submouerat, animus æternæ commendationis appetens
aspirabat. Enimuerò optimè ratione comprehenderas, il-
lis à Te obsessis, tanto ignauiozem ad militiam populum
in vltiori Moschouia esse, quantò laxiorem habitat regio-
nem: quippe flumina quò sunt latius diffusa, eò segniori
profluere cursu: angustis ripis cohibita, & in strictiorem
alueum elisa, torrentes inuehere aquas, docet communis
experientia. Faciebant Tibi spiritum excelsiorem milites
fidissimi: omnes ire paratos, quocunq; iusseris; omnes du-
elli, Martisq; discrimen impauide subire, pugnare, pericli-
tari, sanguine suo commendare posteritati nomen Tuum,
clamor ipsorum alacritatis index manifestus denunciabat.
Scilicet Poloni, cùm à Maioribus, tum à Te egregiè didi-
cerunt; vt in bellica contentione nullum erga Reges bene-
uolentiæ pignus atque indicium omittant; vt eorum salu-
tem suæ præponant; vt se metiantur non ætatis spatio, sed
decoris amplitudine, vt non tam annos, quàm victorias nu-
merent:

merent: vt pro Patria extingui pulchrum ac decorum ducant, multamq; prius, quam longam optent vitam: vt denique in excolenda & adaugenda gloria, cui se totos à pueritia deuouerunt, nunquam meditentur cessationem. Inde sanè habent nobilissimam sagittandi peritiam, quam in eis Persa admiratur: equitandi scientiam, quam Hunnorum, Alanorumq; natio velit imitari, si possit: currendi velocitatem, quam Saracenus, Indusq; non æquat: armaturæ exercitationem; cuius etiam apud remotas gentes, exercituum Duces fortissimi vel pro parte exempla intellexisse gaudent.

Magnanimitatis ergo subsidio munitus, militumque talium comitatu circumseptus appropinquabas, Potentissime Rex, ad Albenſe caſtrum: vile quidem in primo aspectu aliis videbatur, atque altæ fortitudini Tuæ contemnendum: aſt Tu illud ex artificio, non ex trunco corporis æſtimabas; cùm aggeribus robustis clauſum ſcitè, armisq; ſuccinctum ſpectares: & ne hoſtem etiam ſpernendum poſt Te relinqueres, acceptis exercitus aliquot millibus, cæteriſq; in Moſchouiam diſtantiorem relegatis, acceſſiſti animoſus ad oppidum expugnandum. Obſiſtebant oppugnanti principio Albenſes: præfecto ſuo obediebant animanti: pertinaciam ſibi innatam aliquanto tempore non reſmittebant. At vbi frequentius à Tuorum pulueribus tormentariis denigrari; vbi grauius Moſchouia tota cum ſuo Phaétonte tumidè Solem Poloniæ appetente, radiis miraculoſæ potentiæ Tuæ cæ-

pit

pit aduri: subitò tantum æstus, languor tantus subsequutus fuit; ut nisi ad umbram clementiæ Tuæ confugissent, nisi pacis conditiones à Te datas complexi fuissent: procul dubio omnes secum iam esse actum sensissent. Scilicet, alter Cæsar Auguste, tanti apud Te momenti clementia fuit, ut quem Corocottam iam in Moschouia, non Hispania latronem famosum, & publico commodo multum infestum, ad vindicandum quæsieras, & pœnis afficiendum debitis; eidem, postquam ipse spe euadendi, aut latendi abscissa, ultro venit ad Te, pacem demissè oratum, & quæsitus Corocotta Corocottam, Moschus Moschum stitit; depositâ omni ira, & memoriâ tot facinorum, ignouisti; Regemq; illum Deo & cœlo plenum exprimens imitatione, Absalonem quamuis scelestum seruare iussisti; bonos iustitiâ, malos clementiâ concilians, potentiam Tuam non nisi lenitate, beneficio demonstraisti.

Hæc sunt Tua de ferocissimo hoste post hominum memoriam fortunatissima victoriæ monumenta. Hæ res gestæ, ob quas Tibi gratissima meritorum Polonia, non statuas auro nitentes, non triumphos arescentibus laureis decernit atque tribuit: Sed Te inter summos Reges & Monarchas, qui Respub. rexerunt, illustrarunt, dilatant, apprimè collocandum putat. Et prout initium faustè præliandi in Te mirabatur: sic modò de exitu belli iucundissimo, de recordatione dulcissimæ huius victoriæ, latitiam apertè fert abundantem: quod scilicet non


D


mol.

molles aut remissos populos, quales amœna Græcia & delicia orientis producant; non Cares aliquos aut Myſiæ homunciones, verum Moſchos, ad omnem ferociam & immanitatem genitos, in rapinis atque cruentis cædibus exercitatos, multis nationibus bellicosissimis formidabiles, & non magis imperij Tui, quàm totius Orbis Chriſtiani, atque adeò humanitatis ipſius hostes vicisti: quòdque supra felicitatem omnium Regum, tot & tanta millia Moſcorum, tam superbum Tyrannum, nec non totam Moſcouiticam regionem, longam quingentis (vt quidam referunt) latam quadringentis milliaribus, exiguo milite, celerrimè, glorioſiſſimè debellasti.


Iure itaque optimo exultat vniuerſa Sarmatia beata Tuo regimine: namque id, quantalibet vis omnium gentium conſpiret in illam, armis impleat virisque terras, claſſibus maria conſternat, inuſitatas belluas inducat, facilè præſtabit inuictam. Iure Academica Palas toties triumphabat ex felicibus ſucceſſibus Regiæ Maieſtatis Tuæ: non feſellere ſuam pietatem tot vota pro Te publicè facta; nec Tua eam fallit planè paterna prouidentia. Exteræ nationes meritò lætantur; nam cuius antè plenà venerationis præſentiâ ornabantur; nunc eiſdem Regis occupationibus, victoriis, quaſi quibuſdam propugnaculis firmiter munitæ in dulci pace & tranquillitate vitam propagant. Sola Othomanica inſania vt pote quæ in cæde atque ex cæde viuere didicit, & omni tempore in præda & ſanguine verſari; ſola, inquam, immanis


immanis atque importuna istorum natura, quia vento-
sam Tibi, sed minimè formidolosam explicat Lunam,
acerbâ vexatione animi discruciat, noctes & dies sine
furore atque amentia consistere non finitur: quippe im-
piè ac nefariè intelligens, nihil esse tam sanctum, quod
non violari, nihil tam munitum, quod non expugnari
suâ libidine, audaciâque possit. Tu verò Polone Mace-
do, vt Gordium nodum felici manu dissoluisti, explicata
tam arduâ belli Moscouitici difficultate & penitus subla-
ta: ita tibi Regnum Orbis terrarum fato destinatum ha-
be; contra ius fasque errantes Lunas, Tuæ serenissimæ
Maiestatis luce, penitus opprime: Hydras, quæcunq; con-
tra Te portentosa capita erigere audent, vel interfice,
fortissime Hercules noster, vel ad Lernam paludem cum
omnibus suis colubris expelle, extermina, eiice: atque ita
cælum gaudio, Poloniam gloriâ, Mundum Poloniâ,
naturam ipsam exple satietate
viuendi.






Committo me dentibus insipientium, sed veritatis be-
neficio liberandum. *Orosius l. 2. cap. 2.*








R. - 3



848864 Bibliotheca 28000,-
P.P. Camaldulensium in Bielany

Depozyt w Bibliotece Jagiellońskiej



03947

K.VI.6

